



En memoria da

Julia Bucheli - Caduff da Buttisholz/Rueras

07.05.1915 – 13.07.2006

Miez fenadur ha in grond pievel accumpignau a Nottwil (Lucerna) nossa convischina Julia Bucheli-Caduff alla fossa. Naschida eis ella sco schumellina a Rueras sil Crest, feglia dil Leci Antoni e dall'Onna Catrina (Pally da Medel). Cheu ha ella passentau si'affonza ed ils onns da scola cun quater soras e treis frars. Cun nov onns ha ella piars il bab, ina greva frida per ella e per la giuvna famiglia! Da cheu naven ha ei muntau dublamein da setener ensemes, luvrar e spargnar dapertut. Tratga preferida fuva la pulenta!

Quels onns han formau nossa Julia per veta duronta; ell'ei stada ina femna sempla, da siu fatg, ferma e habla. Adina puspei raquintava ella dils «bials» onns passentai a Rueras: sur tut dil temps si mises a Scharinas, dallas excursiuns cun skis encunter Milez. Inaga secasada a Nottwil ha ella adina puspei visitau regularmein siu vitg natal ed aschia francau fermes e restonts ligioms culs da Tujetsch era a lur affons e descendants. Quellas visetas han purtau enqual surpresa. Inaga, arrivada memia tard ad Ursera, ha ella piars il tren e stuiu, tard la sera, serender cun sac e pac e l'entira famiglia a pei sul Cuolm.

Gia cun quendisch onns eis ella (sco biars da Rueras da quei temps) serendida ella Bassa per gudignar in pèr raps. Tier plirs purs da Lucerna ha ella fatg la fumitgasa sco casarina e la finfinala restada definitivamein el Mittelarig a Buttisholz; cheu ha ella empriu d'enconuscher siu posteriur mariu. La decisiun da star ella Bassa ei buca stada leva. E tuttina: ella viseta la scola da puras a Sursee e marida cun 20 onns il pur Josef Bucheli, in um da 40 onns. Quei fatg ha (nus seregurdein aunc bein) dau da tschintschar era a Rueras! Ferma fidonza e curascha admirabla han gidau da tener a mistregn il grond tener-casa cun ultramein aunc da segidar el puresser. Quei tut tier ina gronda famiglia da nov fegl s tschun feglias (oz cun ina figlialonza da 45 biadis e 34 subbiadis). Ina veta plein lavur, d'ina ferma cardientscha fundada ell'oraziun (pilver, nos vegls savevan dir paternos, il s. rusari!). Fastedis e quitaus ha ei buca muncau. Greva ei

stada la sperdita da siu mariu il december 1981, morts ell'aulta vegliadetgna da 87 onns. Gronda dolur ha era la mort anetga dil fegl vegl Sepp igl onn 2001 fatg.

Anno 63 ein Julia e siu mariu setratgs d'ina vart en in'atgna casetta. Julia ha bein gidau vinavon el puresser, ei denton s'occupada intensivamein cun ses nundumbreivelos hobis: leger, far caltschiel, far cun crutsch, dar jass, cultivar egl iert flurs e legums e – far oraziun e dir rusari: ell'ei stada ina gronda veneratura da Nossadunna. Venti-reivla e cuntenta eis ella sesentida en siu pign refugi, observond cun interess e plascher il far e demanar da ses affons.

Plaunet ein sias forzas svanidas e mo nuidis eis ella il fevrer vargau serendida egl asil a Nottwil. Ruasseivlamein eis ellla sepreparada cheu alla mort, priu comiau dils lur e lu spartida cuntenteivla e ruasseivla. Tgei grazia! En tut: ina veta da lavur ed oraziun conforma alla devisa benedictina, per nus in exempl restont grazia a siu natural curteseivel e cuntent, sia profunda cardientscha e fidonza sin Diu. R.I.P.

Inoltrau da Felici Berther